

Chhuah ãan : October 1981

RAMTHAR

FEBRUARY



2026

SUBU KOHHRAN BIAK IN



Subu Kohhran member-te hi Aka hnam niin, Aka ãawng an hman a. Arunachal Pradesh-ah hian hnam hlâwm lian 26 awmin, Aka hi hnem tlém berte zînga mi an ni. Hindi hi an ãawng tualléng a ni. Subu Kohhran hi kum 2010-a din niin, tânah hian member 80 vêl an awm.

THRIZINO BIAL, ARUNACHAL WEST

SERMON

Hetah nge khitah?

Phêk

8 - 12

KUM 42-NA

FEBRUARY 2025

BU 480

RAMTHAR ASSOCIATION CHANCHIN BU THILA KIP CHIUAK

EDITORIAL BOARD 2025 - 2027

Editor

Rev. Dr. C. Chawngmingliana

Joint Editors

Pu Albert Lalhmangaiha

T. Upa T. Lalchhuangliana

News Editor

Tv. Lalringgheta

Circulation Manager

Pu Lallawmnakima Hmar

Publisher

Rev. R. Lalhmingsanga

Member-te

Rev. John Raldosanga

Synod Moderator

Rev. B. Zohmangaiha

Synod Secretary (Sr.)

Rev. Dr. Rosiamliana Tochhawng

Executive Secy., i/c Mission

Upa C. Lalmalsawma

BEC Member

Upa S. Lalthanga

BEC Member

SYNOD MISSION BOARD HOTUTE

Rev. Dr. Rosiamliana Tochhawng

Executive Secretary

Rev. R. Lalhmingsanga

Secretary

Pu Albert Lalhmangaiha

Coordinator

Ramthar lâk chungchângah leh thu chhuah chungchângah
hêngahte lian biak pawh theih kan ni e:

Mobile No: 8974694225 (WhatsApp/Telegram)

Email: ramtharchanchinbu@gmail.com

KUM KHAT LÂK MAN - ₹ 60/-

A CHHÛNGA THU AWMTE

- | | |
|--|-------|
| 1. Editor thukhawchâng | 1 |
| 2. Keimahni | 2 |
| 3. Field Chanchin Thar - masihi Sangati | 3-7 |
| 4. Sermon | 8-12 |
| 5. BUH HMUN AṬANGIN: | 13-26 |
| (1) Ka mite hi thlamuan rawh u | |
| (2) Nula huaisen | |
| (3) Aizawl West II Area Masihi Sangati Meet... | |
| 6. Ramthar Feh | 27-32 |



ENTAWN TÙR DIK



Tùm khat chu USA President 30-na John Calvin Coolidge Jr khân a chênna in, White House-ah a òhian òha zualte zanriah ei tùrin a sáwm a. A

thiante chuan chaw leh chawhmeh eina tùr hmanraw changkâng tak tak an chhawpte chu hman sual an hlahv avângin President zai ngai chung zêlin a tih ang apiangin an ti zêl a. Ei hmasak tùr leh a indawt dân te, hmanraw hman dân tùrte hriat tumin President chêt vêl dân chu an chik ru hle a.

Hlim takin chawhluì chu an kíl ho zêl a. Chutih lai tak chuan coffee an rawn chhawp ta a. President chuan coffee chu a thlengah chuan a leih a, a thiante pawh chuan an ti ve zêl a. Chini leh *cream* a telh leh a, a òhiantè pawh chuan a tih ang chuan an ti ve zêl a. Tichuan, President chu a kún hniama a thleng chu chhuatah a dah ta mai a, a zawhte ei tùrin a ti a lo ni lek si a. Kan mi ngaih sàwng zàwng entawna, an tih dân ang anga thil han tih ve mai hi a awl hle. Fímkhur erawh a ngai hle thung. Entawn tùr dik leh dik lo thliar thiam a pawimawh. Entawn tùr dik lo entawn chu zahna leh mualphona zakhua mai a ni.

Kan mi ngaih sàwng te inchei dân ang apianga inchei ve ngawt hi kan mawipui vek lêm lo. An ei leh in ang apiang eia in ve ngawt pawh kan òhatpui ber chuang lo. Kristianten kan entawn tùr dik tak chu Lal Isua Krista hi a ni. Lal Isua ngeiin, “In chungka ka tih anga in tih vena tùrin entawn tùr ka siamsak che u a ni e,” a tih kha (Jn 13:15). Petera pawhin, “Krista pawh khân a tuarsak che u avângin hetiang ti tùrin koh in ni asin; a hniaka in zuina tùrin entawn tùr a hnutchhiah che u kha,” (1 Pet 2:21) a ti bawh. Paula anga, “Ka awm dân zirtute lo ni hlawm rawh u,” ti ngam khawpa Krista entawntu nih a pawimawh lehzuál. Entawn tùr dik lo entawn hi chhiatna, zahna leh mualphona mai a ni. Entawn tùr dik tak entawn erawh chuan rah duhawm tak a chhuah òhin. Chanchin Òha puan darh hna kan thawhnaah pawh hian Lal Isua tih dân kha entawn ila. Chu bàkah chuan Baptistu Johana te, Paula te, Petera te tih dân te pawh entawn ila kan hlâwkpui viauin a rinawm.

KEIMAHNI† **TUARPUINA:**

(1) Upa Vanhmingliana, Lunglei Zotlang, Nl. Lalsangzuali, Headmistress (Chhinga Veng Kohhran sponsor), Dolaicherra Presbyterian School (Barak Area) pa chu ni 30.12.2025 khán *heart attack* vângin a thi.

(2) Pu Khimbullal Sakachep (91), Baruatilla, Pu Dwijoy Sakachep, Evangelist Teacher, Baruatilla (Cachar Tlangram) pa chu ni 8.1.2026 khán a thi.

(3) Pu C. Rohmingthanga (78), Ramthar Agent, Darlawn Kohhran, ramthar rawngbàwlnaa tui êm êm chu ni 14.1.2026 khán *pneumonia* vângin a thi.

(4) Pi Japantawni (79), Tv. David Vanlalpeka, Evangelist, Bazaricherra (Barak Area) nu chu ni 28.1.2026 khán *cancer* vângin a thi.

(5) Pi Lalnunfeli (36), Pu Lalremruata Khawlhring, Evangelist Teacher, Tuidu (Tripura Mission Field) nupui chu ni 29.1.2026 khán *septicaemia* vângin a thi.

Ramthar Editorial Board-in lu sún chhúngte a tuarpui tak zet a ni. Pathianin awmpuiin thlamuan rawh se.

† **THAWKTU THAR:** Synod Service Board chuan a hnuaià tàr lante hi thawktu thar atán a la:

I. MASIHI SANGATI

Sn.	Hming Pa/Nu	Hming	Permanent Address
1.	Gideon	Laldinpuia	J. Kama Vairengte Field Veng
2.	Nancy	Marandi	Anil Marandi Bandorjuri, Dhumka
3.	Nikita	Kar	Anil Kar Electric Veng
4.	Suhagani	Hembrom	Churka Hembrom Sesawng
5.	RK Lalhmangai	hzuali	RK Lalrohlua Lungdai Hmar Veng
6.	Benjamin	Hrangkhoh	Neisikthoi Hrangkhoh Dholchhora, Assam
7.	Sunita		Yem Bahadur Falkland
8.	Vanlalmalsawm	dawngzuali	VL Chhuanawma Lengte

[Phèk 12-ab chhunzawm...]

FIELD CHANCHIN THAR**AN SAWI MASIHI SANGATI RAWNGBÀWLNA HI**

*Rev. R. Lalrinsanga, Director
Masihi Sangati Kendra, Bawngkawn
Mobile No: 8974236236*



Masihi Sangati rawngbàwlna hi din a nih aṭangin a kum 62-na hmél a lo hmu dáwn ta reng mai. Pathian hruainain tuang takin a kal chho ve bek bek a, zàwi zâwiin hma a sâwn ve zêl bawk a. Kohhranhovah pawh hmun a luah thûk sâwt ta hlein a lang a ni. Masihi Sangati din hun hi a Chiang lo reng a, kan Inkhâwmpui Lian (Convention) pawh a vawi 33-na kan hman hnuah, SEC 315:71 November, 2025 chuan ni 1 September, 1964, Nepali-ho zínga thawk tura Pu Robilala rawih ṭan ni chu Masihi Sangati din ṭan ni atán a pawm ta a ni. Kum 2025 Synod Inkhâwmpui (vawi 102-na) chuan Masihi Sangati Serchhip Pastor Bial thar hawn a rem tih angin, ni 11 January, 2026 khán Serchhip Kawnpui Kohhran Biak Inah hawn a ni bawk a. Tichuan, Masihi Sangati hnuaiyah Pastor Bial 11 a lo awm ve ta a, a làwmawm hle a ni.

Masihi Sangati rawngbàwlna hi péng hrang hrang hmangin hma lâk a ni a. Hêng rawngbàwlna péng hrang hrangah hian Evangelist-ten Pastor te leh Team Leader te kaihhruainain rawng an bawl a. Pathianin mal a sàwm a, kum a vei meuh chuan kan rawngbàwl nain rah duhawm tak a lo chhuah ṭhìn a ni.

Masihi Sangati rawngbàwl naa bung mékte dinhmun han tár lang ila:

- 1. Masihi Sangati Pastor Bial vawng mék - 11**
- (1) Aizawl Central Pastor Bial (Zarkawt)
- (2) Aizawl North Pastor Bial (Zemabawk)
- (3) Aizawl South Pastor Bial (Mission Veng)
- (4) Aizawl West Pastor Bial (Vaivakawn)

- (5) Chhimpui Pastor Bial (Lawngtlai)
- (6) Hmarthlang Pastor Bial (Kolasib)
- (7) Khawchhak Pastor Bial (Keifang)
- (8) Khawthlang Pastor Bial (Mamit)
- (9) Lunglei Pastor Bial (Lunglei)
- (10) Serchhip Pastor Bial (Serchhip)
- (11) Kâwl Pastor Bial (Zuangtui)

2. Synod Gospel Team: Synod Gospel Team hi Aizawl leh Lungleiah kan nei a. Aizawlah hian Team Leader nèn an vaiin member 15 an awm a. Lunglei lamah hian Team Leader nèn member pariat an awm thung a ni. Hêng Gospel Team-te hian a ùlna hmun apiangah Home Crusade, One Day Crusade leh Crusade hmang tein rawng an bawl a. Aizawl lamah hian Kohhran leh Fellowship-ten an sàwmna hmun apiangah rawngbawlin an feh chhuak òin a ni. Aizawl pawn lamah pawh sawmtu an neih fo baw a, kár khat lai han chàm chilha, rawngbawlna an neih òin a awm òin a ni. Tùn dinhmunah phei chuan Gospel Team-te hian sàwmna hi kan chháng séng lo lam a ni. Hun thuhmunah hmun hnih hmun thuma sawmtu kan neih cháng a awm òin a, Team member han insem darh ngaih cháng kan nei ta fo mai. Gospel Team-te rawngbawlna atang hian rah duhawm tak tak kan hmu òin a ni. Anni hi òawng chi hrang hrang thiam awm khawm an nih avàngin sàwm pawh an hlawh a, sawmtute pawhin an hlawkpui òin hle a ni.

Lunglei Gospel Team te erawh chu Aizawl lam nèn an rawngbawl dàn a hrang deuh a. Lungleiah chuan Team tê zawk hian rawngbawlna hmun tùr an inruahman chawp thung a. ‘Tùn òin chu chutah chuan rawngbawlin i chhuak ang u, ringlo an òahnem deuh e,’ an tihna hmunah mutbù nèn an feh chhuak òinpui òin a ni. A hnaivai deuhva riah chilh kher lova rawngbawl cháng pawh an nei a ni.

3. Synod Dialogue Team: Synod Dialogue Team hi tûnah

Team Leader nèn member pakua an awm mék a. Anni hi hnam changkâng zínga rawngbáwlta an ni a. Sorkar Office hrang hranga Officer te, zirna ina mi thiamho te leh hostel-a zirlai te bâkah Damdawi Ina damlo hnênah te, Central Jail thlengin rawngbáwlin hun an hmang ber a. A tlángpuiin kum tîr lamah hêng hmun hrang hranga mite *address* lain, a hnuah zàn lamah an chènna inah lèn chilhin an kàwm òhìn a ni. An chènna in lamah lèn chilha han kawm dáwn tak tak chuan òhà taka lo dawngsawngtu an awm laiin, hnartu an awm fo òhìn a ni. Aizawl páwn lamah pawh rawngbáwla hun hmang tùrin sáwmtu an nei leh zauh òhìn a ni. Dialogue Team te rawngbàwlta hi a hautak a, a chhan chu mi thiam leh vàntláng chung lama indahte zínga rawngbáwl an nih avàng hian Chanchin Òhà hrilh pawh an har hle a ni.

4. Evangelist-te rawngbàwlta: Kuminah hian Evangelist pakua in *pension*-in min chhuahtsan a, tûnah hian Mizoram chhúngah Evangelist 152-in, Meghalaya-ah pathum ten hmun hrang hrangah Chanchin Òhà hrilh rawngbàwl hna an thawk mék a ni. Masihi Sangati hnuaiia kan Evangelist-te hian an awmna hmun leh an bial chhúngah rawng an báwl ber a. A cháng chuan an bial páwn lama rawngbáwla han feh chhuaht cháng an nei leh zauh òhìn a ni. Kan Evangelist-te hi an awmna a zirin an rawngbàwl dân pawh a inang vek lo va. A òhèn chuan Fellowship pangngai tak an enkawl a. Pathianni chauh lovah pawh ringtu member-te nèn inkhâwm hun mumal tak an kalpui theih laiin, a òhèn chu inkhâwmna mumal la neih theih lohna hmunah te an awm bawk a. Evangelist òhènkhat chu ringtu in tlawh an tlawh kualnaa anmahni han òhàwiàwm mai theite an awm laiin, òhènkhat chu mal tak maia ring lo han tlawh ngai te an ni hlawm bawk a ni. Hetianga mahni hmun òhèuhva òhàhnem ngai taka kan rawngbàwlta hi Pathianin mal a lo sàwm òhìn a ni.

5. Kâwl zínga rawngbàwlta: Tûnah hian Pastor pakhat leh Evangelist panga te chu Kâwl unaute zíngah rawngbáwlin an bung mék a. Aizawl véng hrang hrangah awmin, Pastor hian Kâwl

tamna Zuangtuiah a awm chilh a. Pastor hovin thahnemngai takin rawng an bawl a. Ni tin hian Kâwl unaute hi an pung tual tual emaw ni tih tùr a ni a, rawngbàwlna tùr a tam hle. A tam zâwk hi chu puan taha ei zawng an ni a, Buddhist sakhaw zuitu an ni ber. Aizawlah chauh lo pawh Mizoram hmun hrang hrangah rawngbàwlna tùr a awm a. Kâwl ÷awng thiam Evangelist, an zínga rawngbàwla, Lal Isua Chanchin Tha hrilhtu tùr an mamawh thu Kendra lamah pawh kan dawng mék a ni.

6. Chakma zínga rawngbàwlna: Tùn hma a÷ang tawhin Mission Board hma lâknain Chakma unaute zíngah rawng kan bawl reng a. Convention te neihpui kum tinin, Synod Mission Choir te pawhin zaia rawngbàwlna hun an hmang thìn a. School te hawngin, a theih ang angin an zíngah rawng kan bawl a. Kumin a÷ang hian Aizawl khawpuia awmte zíngah rawngbàwlna bul ÷an ÷ula hriain hma lâk a ni a. Chakma unaute hui khâwma Pathian Biakna mumal leh hmun bik neia hma la tùrin an ÷awng thiam Evangelist dah thar an ni bawk a ni. Masihi Sangati rawngbàwlnaah nikum lam a÷ang tawh khán Aizawlah chauh lo pawh ringthar kan neihho zíngah Chakma unaute hi eng emaw zat an tel ta zêl mai a, hma kan lak zual sauh a ÷ûlzia a tár lang àwm e. Kum 2025 chhúng khán Pathianin Masihi rawngbàwlna a÷angin ringthar 3,318 min pe a, kan lawm hle a ni.

7. Tùna Masihi Sangati rawngbàwlna hi a tâwk mai em? He zawhna hi chhan dân leh ngaih dân hrang hrang a awm thei àwm e. ‘Tùna kan kalpui mék dân hi a tâwk khawp mai,’ ti kan awm ang a. ‘Tha pui pawh kan la thawh hlei nê, kan thawk dáwn chauh alawm,’ ti páwl pawh kan awm ngei ang. Thênkhat chu ÷awng pawh thiam chuang miah lo, mahse Masihi hminga Inkhâwmpuia chuan tlaivár pawha zai khâwm hnial leh chuang miah lo, a phûr ber bera ÷ang tlat lawi si te an awm a. Thênkhat chu Bengali, Hindi leh Assamese ÷awng thiam êm êm, mahse Masihi rawngbàwlna lam chu a ngaihna leh ÷ûlna hre miah lo, rawngbàwltute zíngah pawh a lo awm theih khawp mai!

He zawnha hi ti hian chhàn i han tum teh ang.

Masihi Sangati-in a tum ber chu, Masihi Sangati Kaihhruainain min hrilh dàn chuan: *Mizorama ringlo rawn lût zawng zawng Kristiana siam*, tih a ni bur mai a. ‘Kan ti lutuk deuh em ni aw?’ a tih theih àwm e. Amaherawhchu, Mt 28:19 kan en chuan, kan Lal Isua khân, “...*kal ula, hnam tina mi zirtírahte siam ula,*” tiin thu a lo pe daih tawh a. He thu pêk hi Kohhranhote chuan kan zàwm mai tùr ni àwm tak a ni. Tûnah pheih chuan Sairangah Rél a lo lût ta bawk nèn, ni tin hian kan sàwm, kan koh khâwm vàng ni miah lovin, ram hmasâwnna kal zêl avàngin ringlo an lo lût ta ruih ruih mai a. Hnam hrang hrang, ram hrang hrang aṭangin, Chanchin Ṭha kan hrilh tùr Pathianin a rawn hruai lût ta a ni. Hêng Chanchin Ṭha la dawng miah lote hi kohhranhote hian kut kan lo kuangkuahsan mai dáwn em ni?

India ram lailiah Chanchin Ṭha hril kawngah kan Missionary-te an chêp tawhzia kan hria a, Jail bangte hial an zút a nih kha. Pathian hian Zoram Kohhrante Chanchin Ṭha hril kawnga ṭhahnem kan ngaihzia hriain, an hmunah zalèn takin Chanchin Ṭha hril thei lo mah ila, he kan ram ngeiah hian kan zavaia kan hril theih nán **Mission Field** thar min hawnsak ta a nih ber hi. He Buh Hmun thar Pathianin min vahsakah hian Chanchin Ṭha chi tuh tùrin i pên chhuak ve dáwn lâwm mi? Tûna Masihi Sangati hnuai thawktu ringawt tán chuan hêng ring lo, ni tina lo lût zawng zawngte Chanchin Ṭha lo hrilh zêl tùr chuan kan la indaih ngang lo a ni.

Chuvàngin, Kohhranhote hian an ram lama an lêt leh hma ngei hian tha pui kan thawh a hun ta hle mai. Thlarau bo pakhat tal i Chhandamtu hnênah hian i hruai ve dáwn lâwm ni? Kut ruakin i tâwk ngam chia ang maw?





SERMON HETAH NGE KHITAH?

Chhiar tùr: Mt 6:19,20

*Upa Lalvena Hnamte
Tlangnuam Vengthlang
Mobile No: 9862208828*



Khawvêla kan nun phungah hian, ni tina kan sum leh pai hmuh te hmang ral nghâl mai zêl chi kan awm a. Chutih laiin, inren thiam taka sum khâwla, in leh lo leh ram te leia, ro khâwl lama rilru pe tlat mi kan awm bawk a. Mi tu pawh zâwt ta ila, fîng kan tihte chu inkhâwl taima, sum renchem thiamte an ni ngei ang. A chhan chu, hun lo la awm tùr leh, anmahni chauh ni lo, an tu leh fate tán thlenga retheihna pumpelhna tùr an ruahman vâng a ni. Tin, khawtlânga kan dinhmun pawh hei hian a hril tel thui viau bawk. *‘Tûn chauh nge, tûn leh nakin’* tih hi kan bûk thiam a tûl ta a ni.

Kan Lalpa Isua chuan, *“Leiah, sùlrûl leh tuiêk in a ei chhiat naah, rûkruten an reh pawha an rûknaah hian, in tán rote khâwl khâwm suh u. Vànah sùlrûl leh tuiêkin a ei chhiat lohnaah chuan, in tán rote khâwl khâwm zâwk rawh u,”* tiin min zirtír a (Mt 6:19,20). Tirkoh Paula pawh-in, *“Khawvêlah hian eng mah kan luhpui si lo va, eng mah kan chhuahpui thei bawk hek lo,”* a ti bawk (1 Tim 6:7) .

pawimawh tak pahnihte hian ringtute tán kaihhruaina ða tak min ruahmansak a. Leia kan awm chhúng hian lei lam thilte ringa nung tùr leh, inenkawl tùra siam kan ni a. Hêngte hi Pathian malsàwmna kan dawn chhan pawh an ni. Chutiang atána kan hman bâk leh mamawh bâk chu mi tin leh chhúng tin deuhthaw hian dah ðat leh khâwl khâwm kan nei àwm e, a tam leh tlèm dàn erawh a inthlau viau thung ang. Eng pawh ni se, vâna ro khâwl khâwm nacháng

Hêng thu dik leh

hriat tel chu tihmâkmawh a ni bawk si. Tûn atána taima leh fing taka thawk chhuaka, hman ral dân tâwk thiama, thlarau lam nun ngaihtuah tel bawk mi nih a ùl tihna a ni. Ngun taka ngaihtuah chungka kan neih ro sum te, kan theihna dangte kan hman thiam a pawimawhzia zir chhuah i han tum teh ang.

Pakhatnaah chuan, leiah hian thatchhe tak leh dâwng-dah taka nunga, Pathian malsâwmna kan dawnte hi nawmchen nán te, chapo nán te, Pathian theihngihl phah nán te hman tûr kan ni lo. Kan ni tin ei leh in tûr lei nán te, chhúngkaw hmasâwmna atán te, hrisèlna atán te, Pathianin malsâwmna min pêk chhàn lét nán te kan hman tûr a ni. Nawmsip bàwl nán leh thil ùl lo dang lei nán erawh hman a thiang lo. Min petu min pêk chhanah an tel lo.

Pahnihnaah chuan, nun pahnih nei tûra siam kan nih kan hre reng tûr a ni. Nun hmasa zâwk leh rei lo zâwkah

hian thinlung zawng zawng leh neih zawng zawng hman- a inséngso ral mai tûr kan ni lo. Nun pahnihna, rei zâwk leh tàwp tawh lo tûr zâwk lam atán kan ngaihtuahna leh kan ro te kan khâwl/khêk ùl a ùl. Himalaya tlánga láwn tûrte chuan a tláng chhíp an thlen hmain chawlh lailâwkna (*Base Camp*) 2/3 an pal tlang ùl. An tum tak an thlen hmain an boruak (*oxygen*) te, ei tûr leh in tûr te chutah chuan an chèn ral mai tûr a ni lo. Tláng chhíp an làwn chhuah hun te, an kîr lehna kawng tûrte an hisáp tel vek zâwk ùl.

Pathumnaah chuan, Tlangval hausa, chatuan nunna zawngtu hnênah Isuan, *“I neih zawng zawng hralh la, pachhiate hnênah sem rawh; chutichuan vânah ro i nei ang; tin, lo kal la, mi zui ang che,”* (Lk 18:22) a tih khán, *“Leia i hausakna te hi vânah ram bank-ah deposit fel vek rawh,”* a tihna a ni a. A chatuan hmun a thlen huna a la ùlkaipui tûr kawng a kawh hmuh a ni. Paulan a sawi anga he khaw- vèl àtang hian eng mah kan

chhuahpui theih si loh avàngin kan neih ro sum te chu an kalna tùr dik takah, keimahni duhthlan-na ngeiin, kan dam lai hian an kal fel hman tùr a nih chu. Spanish thufing chuan, *“Mitthi kawr hâk tùrin iptê a neih a ngai lo,”* a ti. A iptêah chuan eng pawh ahtír ila, a hmang ñangkai tawh chuang lo tihna a ni.

Alexander Ropuia, Greek lal ropui leh Hausa tak mai chuan a thih huna a kuang an zawn dân tùr leh an vui liam dân tùr a rél fel lâwk a. *“Ka kuang ding lam leh vei lam in rek pawp ang a, ka bán ding lam leh vei lam in dah chhuak ang. Khawvêl atang hian eng mah ka chhawm chhuak thei lo tih entír nán, ka kut chu a ruak a ni tih mi zawn zawn gin an hmu tùr a ni,”* tiin. Tin, a sum báwma a sum neih zawn zawnge chu a kuang zawn-tute hmaah kawng tluanin an theh darh ang a, a duh duhin an chhar tùr a ni, a ti bawh.

Palinaah chuan, leia kan thil hmuh theih leh

khawih theih hi vàn ram thleng thei lo vek an ni. Entír nán: rangkachak, lungflu, pawisa, in leh ram te bàkah mihring taksa ngei pawh hi. A bungrua tak ni lovin, an hlutnain hna ña leh ñangkai an thawh te zâwk kha vàn rama an hlutna an lo chhinchhiah tùr chu an ni zâwk, a neituin a hman ñangkai dân kha Pathian làwm zawn a nih chuan.

Leia kan hmuh leh khawih theih si loh, kan pèk chhuah leh kan dawn theih te: hmangaihna, lainatna, khawngaihna, ñanpuina, etc. te hi vàn lam mitah chuan tak nei, hlu bawh, ñangkai bawh, vàn rama chhawm luh theih bawh an lo ni zâwk. Thufingte 19:17-ah chuan, *“Mi rethei khawngaih chuan Lalpa a pùktír a ni a, a thil tih ñat chu a rùl ang,”* tih kan hmu a. A rulhna chu *‘mi rethei khawngaihtu vàn ram account-ah an lo deposit sakna’* kha ni àwm tak a ni. Lei lam malsàwmna pawh a keng tel thei tho bawh. Paulan, *“Theh tlém chuan a*

ât tlém ang a, theh tam chuan a ât tam ang,” (2 Kor 9:6,7) a tih te nèn pawh hian a inmil hmèl khawp mai.

Lei leh vòn lam *team* tâng kawpten kan ro báwmte hi min en diksak ta hlawm se, kan chhêk khâwl hi a inang lo thei viau àwm e. Lei lam *team* ten, “*Ani hi chu eng mah neih mumal a nei lo,*” an tih te kha, vòn lam *team* chuan, “*A hausa khawp mai, tangka leh rangkachak nei lo mah se, Pathian hnêna thleng tlâk rinna leh thiltih a ngah êm mai,*” an ti thung thei tlat. Hei hi kan ngah tùr dik tak, kan khâwl khâwm tùr dik tak zâwk chu a ni e. Thil ãa ti atán Krista Isuaah chuan siam kan ni a, rinna ringawt hma-chhuana vòn ram thlen tum te hian, vòn ramah hian kan chèn vena tùr khawp hmun siam tùra thil ãa tih (a tak taka Isua zirtírna nunpui) hi kan lo nei tlém hle palh thei a ni.

Rom lalten Kristiante an tihduhdah vânglai khan Rom sawrkar officer-ten vawi khat chu kohhran thil neih hlu te

chhuhsak tumin an hmunhma te an luh chilh thut mai a. An hotupa ber chuan Deacon Laurentius-a hnênah chuan, “*In thil hlute in dahna min entír rawh,*” tiin khauh takin thu a pe a. Laurentius-a chuan mi chanhaite an dah khâwmna chu kawh hmuhin, hmeithaite, fahrahte, dam lo an enkawl mékte chu “*Hêngte hi kan ro hlu dah khâwmte chu an ni e,*” tiin a chháng ta mai a. Rom sawrkar officer-te thinlung a khawih dân chu a dang khawp mai le.

Isua zuitute hian a zui lotute ngaih hlut leh khâwl khâwm ang tho em ni kan ngaih hlut ve dáwn? “*In tán vannah rote khâwl khâwm zâwk rawh u,*” tia duhsak taka min zirtírtu tho kha asin rorèna ní-ah kan la hma-chhawn tùr chu. Engtin nge ro min relsak a kan rin le?

A tláng kawmna atán chuan, thih thlamuanna kan tih pawh hi keimahni rinna leh thiltih bawh hian a la hril dáwn niin a lang. Lei lam hausakna leh ropuina ringawt

buai puitu tán chuan khawvêl
 chhuahsan hi a hrehawm lo
 thei lo. Chutih laiin, vãn lam
 thilte lungkhama, Lalpa duh
 dàn zawnga, zàwm hrâm
 hrâm thìnte tán erawh chuan,
 mahni ro chhêk khâwlna lam
 pan chu a phùrawmin a
 châkawm hle ang le. Kan zin
 bo rei deuh hnu hian eng

vàngin nge mahni in lama haw
 kan châk viau thìn, kan tih
 chuan, keimahni in leh lovah
 ngei khân kan tâ kan tih
 ngam, kan neih hlu ber ber
 te chu an awm tlat atin ni.

Chhiartu zawng zawng-
 te Lalpan malsàwm che u
 rawh se.

Phêk 2-na (chhunzawmna)

II. EVANGELIST TEACHER

- | | |
|------------------------|-----------------------------------|
| 1. N. Seema Devi | N. Lokhon Meitei Dam Veng |
| 2. Gospel Hmingduhawmi | F. Vanlalmana Bawngkawn Hmar Veng |
| 3. R.C Lalduhpuii | R.C Thangzela Ramhlun Venglai |
| 4. Laltanpuia Zadeng | Lalremruata (L) Maubawk |
| 5. Lalnunpuii Ralte | Vanlalruata Ralte Thingsulthliah |
| 6. Lalruatfeli | Lalrinthanga Thinghlun |

III. EVANGELIST

- | | |
|------------------------|------------------------------------|
| 1. Saitluangpuii Sailo | Saizawna Sailo Serchhip AOC Veng |
| 2. Vanlalhluna | Chhuanvawra (L) Lungdai Hmar veng |
| 3. J.C Lalmuanpuii | Kaptluanga Phuaibuang |
| 4. Emy Lalawmpuii | Chauhbuila West Phulpui |
| 5. Alan Lalruatfela | Lalrulliana Zaita |
| 6. Lalsangzuala Ralte | Daniala Ralte Kolasib Project Veng |
| 7. Lalremthangi | Lalremruata (L) Kanghmun |
| 8. Lalngaihawma | Chiliana Lenchim |
| 9. C. Vanlalruati | C. Zoremsiama Nursery Veng |
| 10. Merina Lalrinpuii | Lalrinzuala Kauchhuah |
| 11. Vanlalruatsangi | Zosangliana Sakawrtuichhun |

IV. CRAFT TEACHER

- | | |
|--------------------|-------------------------------------|
| 1. Vanlalhlimpuii | H. Lalthakima Bilkhawthlir |
| 2. Lalchhandami | C. Sangzawna Hnahlan Dam Veng |
| 3. K. Lalhminghlui | K. Lalchuangkima Chhiahtlang Sailam |

BUH HMUN AṬANGIN KA MITE HI THLAMUAN RAWH U

Dr. K.C. Lalchhingzova
Rayagadha, Odisha
Mobile No: 9556902694



“Nasa takin min lo ṭawngṭaipui rawh aw, Agya. Lalpa, Isua hi ka kalsan dāwn lo. Isua tán chuan thih pawh ka ngam a ni,” tia ṭap chungin phone-a ka biak mék chuan a sawi a. Ka rilru a vâk thui kher mai. He hmeithai la naupang tak hi nikum hmasa (2024)-a pasal sún ta kha a ni a.

Kum 2024 chawhnu lama kan Biak In saknaa rawn inhlawh ve ṭhìn, chûng hun aṭanga Pathian hmangaihna avànga lo piangthar ta a ni a. 2025 kum tîr lam khán ringtu-ah inpein baptisma a chang ta a ni. Nimahsela, tûnah erawh chuan nasa taka dodàlna tâwkin ringtu a nih avàngin an khua aṭanga hnawh chhuah niin, thla khat chhúng ngeia an khua chhuahsan tûra tih a ni ta a. Tin, tu pawh amah bia emaw, kàwm emaw apiangte chu amah anga en ve an nih tûr thu an sawi bawk a ni.

Hetiang thil lo thlen chhan chu hetiang hi a ni.

August ni 5, 2025 zàn khán kan member, Bonish Kadraka, Gopalpur khuaa mi chuan dam lohna avàngin chatuan ram min pansan ta hlauh mai a. Ani hi kan Biak In sakna hmun min petu, ka ṭhianpa kha a ni a. Tichuan, a tûkah chuan kan kohhran thlànmmual atána hmun kan lei, ngaih ṭha taka ‘kan ram’ tia kan lo sawi ṭhinah chuan kan phúm ta a.

He thlànmmual hmun hi tûn hma lama kan kohhran mi ni ṭhìn hnên aṭanga kan lei a ni a. Thlànmmual atána hman dāwn hunah harsatna eng mah a siam loh tûr thu pawh wavi tam ka kiangah a sawi tawh

nghe nghe a. Tichuan, ngaih
 tha takin kan thlànmuah
 hmunah chuan kan thianpa
 ruang chu kan zalh ta a.

Nimahsela, chutia kan
 invúi zo, kan hâwng chu
 kawng lakah kan ram leina
 pa khân min lo pan a, thinrim
 takin min chhuahchhâl ta vak
 mai a. Ani hi tûn hma chuan
 kan member tha tak a ni thìn
 a. Mahse, uirèna suah avàng
 leh thil dang avàngin a rinna
 a kalsan ta a, tûnah chuan ring
 lo ang maiin a khawsa leh
 tawh a. Ani chuan, *“Thil eng
 mah min hrilh lovin in thû
 thûin mitthi in phùm a, eng
 vàngin nge hetiang a in tih?”*
 min ti ta a. Kei chuan, *“He
 ram hi mitthi phùmna tûrin
 kan lei a. Sum leh pai pawh
 kan inpe fel a, a leina lehkha
 pawh ziakin kan inhlàn fel vek
 a. Nang pawhin, ‘Harsatna
 eng mah ka siam lo vang,’
 tiin ka hnênah pawh i sawi si
 a,”* tiin ka han sawi ve a. Ani
 chuan, *“Khatiang khân ka
 sawi ngei a, Mahse, tûnah
 chuan a theih tawh loh.
 Tûnah chuan nangni nèn hian
 inzawmna pakhat mah kan*

*nei tawh lo. Chuvàngin, he
 thil hi in ti thei lo vang,”* tiin
 min chháng leh ta a. Chhàn
 zui zêlin awmzia nei dáwna
 kan hriat loh avàngin kan
 kalsan ta a.

Chumi zàn chuan kan
 ram leinapa chuan an khua
 leh an chheh vêl khaw ruk
 lai aţanga mipui lo kal
 khâwmte chuan kan member
 boral ta, Bonish-a te kuaah
 chuan meeting anrawn nei ta
 a. An thu rêt chu, *“Ram in
 inleisak dân chu kan hriatpui
 lo che u a. Nimahsela, kan
 khaw rama mitthi inphùm hi
 kan phal lo. Chuvàng chuan,
 phawrh leh ula, hmun dangah
 phùm rawh u,”* tih a ni ta a.
 Kan Kohhran mite kan tlém
 si a, chu thu chuan min
 timangang hle mai a. Tin,
 chùng thu avàng chuan kan
 mite awmna khua khawiah
 mah mitthi inphùm chu an
 phal dáwn lo tih a hriat ta hle
 mai a. Chutih laia kan rilru
 buai dân leh ţanpuitu kan
 mamawhzia chu nasa tak a ni.

Nimahsela, chutia kan
 buai mangan êm êm lai chuan

Lalpa kan Pathian, mangan laia ãanpui vartu hnai reng chuan min kalsan rêng rêng lo va. A ãanpuina avàngin kan awmna khua Rayagada-a Lutheran Kohhran Pastor Senior pakhat, pa ang maia kan en ãhin chu kan mangan thu ka va hrilh ta a. Ani chuan rem min ruatpuiin Omega Christian Cemetery, Rayagada hmuna phúm tùrin rem min ruatpui ta a. Kan mite awmna hi kan awmna khua aãangin Km 10 vèla hlá a nih avàngin ruang phurhna tùr chenin ngaihtuah a ngai a, chùngte pawh chu ani ho hian kan buaipui chho ta zêl a. Tichuan, a tûk, ni 7 August, 2025 chuan kan mitthi phùm tawh chu phawrh lehin OCC, Rayagada-ah chuan kan inphúm leh ta a ni.

Chùng kan thil tawnte avànga rilru hrehawm taka kan awm lai chuan hmélmapa Setanan a theih tâwp rawn chhuah belhin, Gopalpur khua leh a chheh vèla mite chuan kan mite leh kan Kohhhran tihbuaina tùr remcháng an rawn zawng chhunzawm

nghâl zat mai a. Kan inphúm fel hnu ni hnihnaah chuan Gopalpur khawtláng mipuiho chuan ro rélin Pu Bonish-an a boralsan tâk a nupui fanaute chu an khaw chhúnga chêng reng tawh lo tùrin thu an titlu leh ta a. Anni hian kan Biak In sak nán hmun an pêk avàngin an duh a nih leh Biak In bulah chuan khawsa ve mai tùrin an ti a; khaw chhúng aãang erawh chuan thla thum chhúng ngeia chhuak tùrin thu tûkna an siam ta a. Chu mai a la ni lo va, an khaw kianga awm Ulikiguda mite pawhin Bonish-a te lam hnai ringtu hmeithai, a fapa naupang kum 7 mi lek nèna khawsa chu nasa taka rîkrâpin ro an rêlsak a, an khua aãangin an hnawt chhuak ve leh ta a. Tin, Pastor (Pathian rawngbâwl-tute an sawina) tu mah an khuua lût tawh lo tùr leh a lût apiang chu an chungah thil ãa lo tak an thlentír tùr thu sawiin kan mite chu nasa takin an vau bawk a.

Hêng thilte avàng hian kan miten hun harsa ber an tawh laiin anmahni thlamuan

tùrin tlawh theih an ni lo va, a theih ang anga phone hmanga inbiain ÷awngtainate kan nei ÷hìn a. Chutianga kan inbiakna chu a chung a ka han tàr lan tâk khi a ni. Kan mite hian thlamuan an mamawh tak zet a. Anmahni thlamuan tùrin tih theih kan nei tam si lo va, rilru a hrehawm duh kher mai. Pathian thuin, “*Thlamuan rawh u, ka mite hi thlamuan rawh u!*” in *Pathianin a ti*,” (Isaia 40:1) tia a sawi chu ka thinlungah a chám reng mai a. Lalpa Pathianin a hmangaih êm êm, kan mite chu thlamuan tùrin kan chakna leh theihnain a tlin si lo va, khawi lam a÷angin nge min ÷anpuina tùr chu a lo thlen ang tih chu ni tina ka rilru ngaihtuahna luahtu a ni ta a ni.

Nimahsela, kohhranin hetiang hun harsa kan tawh lai hian nasa takin Lalpa kan Pathian chu kan au va, mi tam takin min ÷awngtaipui baw a. Tih theih nei lo leh lam ÷ang nei lo dáwn viauva kan lan laiin mak deuh maiin Lalpa ÷anpuina kawng dangah kan

hmu thar zêl a. Kan mite hi chan chhe tak leh tihduhdah tuar ni mah se, Pathian an rinnaah an ding nghet tlat mai a. Tùn hma lama huaisen vak lo nia kan hriatte pawh kha Pathian leh a kohhran tán chuan mipui hmaah pawh huaisen takin an ding ngam zêl ta mai a! Tin, kan lu sún chhúngte pawh hi an chhúngkhat lainaten Isua an rinna phatsana khaw chhúnga thlamuang taka awm leh mai tùrin an thlêm reng nâa, anni lam erawhin inlamlêl lam an hawi lo thung a.

Ringtute zingah hmeithai awm ném zâwk leh ringtu an nihna la rei lo zâwkte pawh huaisen takin Lalpa tán an rinawm ta tlat mai a. An ÷awngkamah pawh an rilru chu buai viau mah se, an hnung tawlh hauh lo tih a lang thei a. Hei hian miten hmuh theih taksa leh kohhran mite chu dodâl mah se, Lalpan kan mite thinlungah a ram a sawh nghet zêl zâwk a ni tih min hmuh fiahtír hle a. Chumi avàng tak chuan, hetiang hun harsa kárah pawh hian min

kalsan ngai lotu Lalpa avàngin làwmna kan la nei cheu a ni.

Tin, mak deuh maiin Pathian awmpuina kan chang zêl a. Kan Biak In pawh min tihchhiatsak duh hial khawpa rilru tha lo putu pawh an awm a. Nimahsela, Lalpan a kohhran leh a biak bûk thianghlim chu vawiin thlengin min vèn himsak a. Khawtláng huapa ro an rênnaah pawh chutiang lam thil chu thu tlûkna siam tùr khawpin sawi a hlawh pha rih lo a ni. Tin, an khuaa rawngbáwlto tu mah luhtír phal lotu khuate pawh kan miten khawtláng mipuiho hnênah ngaihdam te an dil hnuah chuan chutianga an ro rên khirh tak pawh chu an thlah duh leh ta a ni.

Tin, tùn hma ațanga kan mite leh ringtu nih ve duhtute lungkham ber thin chu an thih hnuah inphùmna tùr an neih loh an hlauh thu hi a ni thin a. An khaw miten ringtute chu an rama inphùm an phalsak loh thin avàngin ringtua inpêk pawh an ngam mai thin lo va, ringtute tán

pawh an rilru helhkamtu ber pakhat a ni fo thin. Hetia kan Kohhran thlânmuual ram tia kan lo sawi thin hmun a hman theih tâk lohvah chuan rilru a hrehawm duh hle mai a. Nimahsela, Lalpan kan duh leh mamawhte a hre êm êm a, tùn hma lam deuhva kan lo dil tawh thin, a chhànna kan hmuh mai loh, Omega Christian Cemetery-a member nih kan duh ve thinna chu he kan hun tawn avàng hian Pathian zarah phalsak kan lo ni ve ta a. OCC hmunah hian kan awmna, Rayagada Pastor Bial huam chhúnga kohhran pahnih, thlânmuual la nei lote tán membership pangngai takin kan lo nei thei ta zâwk a ni.

Hetianga hian dodâlna leh harsatna tam tak tâwk mah ila, Lalpa kan Pathian tanpuina leh a chên chilhna kan chang zêl thung a. Lalpan kan mite thinlungah huaisenna leh chakna a tûl dân ang zêlin a pe zêl bawk a. Mi tam takin min tawngtaipui reng bawk tih kan hria a. A mite tawngtaina chu Lalpan a

ropuina tùrin min chhànsak ngei dáwn tih kan ring bawk a ni. Tûnah hian kan unaute, khua ațanga hnawh chhuah tâwkte chungcháng pawh hi engtiangin nge hma kan lak zêl ang tih kan inhre thiam lo hle a. Mahse, keinin a ngaihna kan hriat loh lai hian Lalpan remruatna fel tak, a thiltihtheihzia tàr lanna tùrin

a nei ngei ang tih kan ring tlat a ni. He kan hun tawn mék hian Pathian Ram zau zêlna tùrin rah țha min chhuahsak ngei ang tih kan beisei tlat a. *“Thih thlengin rinawmin lo awm rawh,”* (Thup 2:10) tia min chahtu chuan a tàwp thlengin min awmpui reng dáwn tih kan hre si a.

KUM 2025 CHHÚNGA MISSIONARY RAMTHAR LÂKSAKTUTE (*Chhunzawmna*)

97. Ramhlun Vengthar Kohhram	50	3,000
98. Seling Kohhran	35	2,100

[Missionary Ramthar lâksaktute hi Missionary-te tán chauh ni lovin, Ramthar kal zêlna atán in hlu tak zet a ni. In chungah thinlung takin làwm thu kan sawi e. - Editor]

SYNOD RAMTHAR PALAI YOUTUBE CHANNEL

Synod Mission Board chuan **SYNOD RAMTHAR PALAI** tiin *YouTube Channel* a siam thar a. Hetah hian Missionary te, Missionary pensioner te, Kohhran hrang hrang Ramthar hma lâkna chanchin te, etc. dah a ni a. Hei hi Ramthar rawngbàwlina kawnga Kohhranhote leh Missionary-te kan intihchak tawwna atána buatsaih a ni a. Lo thlir țhìn tùrin kohhranhote kan insáwm e.

NULA HUAISEN

*“Ka pu, theih tâwp ka chhuah ang a,
ka hruai haw ngei ngei tùr a ni!”*

*Rev. David Lalramliana Ralte, Field Secretary
Upper Assam Mission Field, Dibrugarh
Mobile No: 9971019808*



December ni 3, 2025 tlai a ni a, Dibrugarh Inter-Church Forum (DICF) Committee member pakhatin WhatsApp-ah thu pawimawh min rawn thawn thu leh chu chu lo en nghâl tùrin min rawn hrilh a. WhatsApp ka en nghâl a. Politics thila hamthatna beiseitu mi pakhatin Facebook-ah *“Dibrugarh khaw chhúngah Kristian Evangelist-ten kan mite Kristiana inlehtír tumin hma an la nasa a. He thilah hian Mizoram aṭanga Mizo lo kalte pawh an tel a, Milan Nagar East leh West-ah an chêng,”* tiin thu a lo theh darh (post) a.

He a thu post hi Assam Chief Minister te, Dibrugarh Superintendent of Police te, Minister pakhat te leh MLA ten an lo hmuh ngei tùrin an hming a lam bâkah, hma la ngei tùrin a zualko nghâl bawk a ni. Dibrugarh-a BCM Field Director-te in luah leh an motor thla te, Church of North India (CNI) Biak In thla te, kan Missionary, Pu C. Lalnunzira te in luah leh an *bike* thla te, Milan Nagar-a kan Mission Preaching Station inkhâwmna in thla te a post a lo ni a.

Dec ni 5 khán Pu C. Lalnunzira te in luahah mi pahnih kalin, Pu Zira nupui Pi B. Lalruatdiki (missionary) amaha a lo awm chu thu an zâwt nual a. Pu Zira erawh rawngbâwlna thilah a chhuah hlân a ni a. An pa chu a lo haw vêleh Police Thànâ-ah in-report tùrin an chah a, an in luah pawh a hma thei ang bera chhuahtír tùrin an in luah neitupa pawh an hrilh nghâl nghe nghe a. An chhuahtír vat loh chuan thil ṭha lo a thlen palh thuah *police* lamin an vên theih loh tùr thu an hrilh hial

mai a! Chu mi pahnihte chu CID mi, *civil dress*-a inthuum an lo ni àwm a. Hemi tlai vêk hian Dibrugarh-a TV *news channel* pakhatah he thil hi an lo chhuah nasa bawk a. Hêng thilah hian a phênah Assam Chief Minister meuh a inrawlh avângin boruak a punlun chak hle. Kan Missionary-te chhúngkua himna tûr ngaihtuah ve vat vat a tûl ta!

He thu hi Dibrugarh-a kan Mission Kohhran member NI. Junali Kalita hnênah tih ngaihna a hriat tâkin tiin Dec. 5, zân dâr 10 pelh tawh hnuah thlen a ni a. Ani lah khawsik vângu nuamsam lovin a mu hma ve a lo ni a. Chuti chungin, “*Kan Missionary-te chungu thil thleng hi mutsan thei ka ni lo,*” tiin na chhâwkna ein amahin Police Station chu a pan ta a. “*Kan unaupa, ka chhúngte an ni a. Hetia dik lo taka puhna mai mai avângu man tura in ti hi, a fînfiáhna tha tak min pe ula, a dik a nih chuan dân angin hma in la thei ang. A nih loh chuan a laka hretu atána hming ziakho zawng zawng*

te hi Court-ah ka khing ve dâwn,” tiin ni 6 zîng dâr 2:30 thleng Police Thànâ-ah a awm a ni (He thu hi aman phone call-a min hrih dân a ni).

Police-te chuan a tûk December ni 6, chawhma dâr 9:30-ah Pu Zira chu thu zawh fiah tûra Police station-a in-report ve phawt tûra hrih tûrin an chah a. Ni 6 tûk khân NI. Junali chu *phone-in* ka bia a, kan lo tawngtâipui tûr thu ka chah a. Ani chuan, “*Ka pu, theih tâwp ka chhuah dâwn a, ka chungu eng pawh thleng rawh se, pawh ka ti lo. Tlai dâr 4:30-ah Pu Zira hi ka hruai chhuak ngei ngei tûr a ni, lo tawngtâi tlat phawt mai rawh u!*” tiin min thlamuan a. Tichuan, Field WhatsApp group-ah thawktu zawng zawngte zân dâr 9:30-10:00 inkárah mahni hmun theuhvah tawngtâina hun hmang tûrin kan inchah a, tawngtâina hun kan hmang ta a.

Kha ni kha a rei ngat ngat hlê a ni. Tlai dâr 4:35 khân NI. Junali chuan min rawn *phone* ta ral ral a, “*Ka pu, hei*

Thànâ aṭangin kan chhuak ta a, nizân khân thànâ-ah kal lo ila chuan ka unaupa case hi vawiin lamah court-a put luh tûrin an lo ruahman fel hman ṭêp a. Jail-a khung an lo tum nasa a. Theih tâwpin ka inhniulpui a, in ṭawngṭaina Pathianin a chhâng a, ka va lâwm êm!” a rawn ti ta. Field WhatsApp group lamah lâwm thu sawina ṭawngṭaina hun hmang leh ṭheuh tûrin kan inchah ve nghâl a.

Tûnlai India ram chhúng hmun hrangah *party* mal pakhat rorèlna hnuaiiah Kristiante leh Chanchin Ṭha hril hna dodâlna a zualkai hlê tih kan hre ṭheuh àwm e. SMB hnuaiia kan rawngbâwl-na hmunte bâkah Kohhran pâwl dangte pawh huamin, hmun

tam takah a ram mi ringhartan vau khànna khirh tak tak an tawh ve avângin ‘Ualau takin kan Missionary-te thlavâng hauhvin an ṭang ngam meuh dâwn lo em maw ni chu aw?’ tiin ngaih-tuahna a put theih hial mai! Chutiang kárah kan Mission Kohhran member ngei mai, NI. Junali Kalita, Pathian hmanrua kan nei hi a va lâwmawm tak êm!

An chhúngkaw zíngh amah chauh Kristian a la ni chungin, an in chhúngah Pastor leh rawngbâwltu dangte min lo làwm thiam êm êm ṭhìn a, ṭawngṭaina pawh an dawng-sawng ṭha hlê ṭhìn. A chhúngte pawhin Lal Isua an lo pawm ve thuai theih nân in lo ṭawngṭaipui ve theih chuan kan lâwm êm êm ang!



Lo neitu pakhat hian rilru sawi inkhâwmah hian, “*Hma chu ka sâwn hran lo; mahse, ka nghet a ni,*” tiin a sawi fo va. Vawi khat chu a tawlailir chu chirhah a táng ta hlauh mai a. A ṭhianpain a rawn hmu fuh a, “*Ṭhianpa, hma chu sâwm lâwm lo mah la, i nghet hlê mai,*” a rawn ti a. Ringtute hi Isua anna kawnga ṭhang lian zêl a ni.

AIZAWL WEST II AREA MASIHI SANGATI MEET KAN CHHIM

*Lalrinblua, Evangelist Teacher
PMS, Gharmura
Mobile No: 8794576633*



A hmasa berin Luangmual Vengthlang Kohhran te leh Hailakandi bial te Krista avànga inzawmna ropui tak kan nei hi Pathian hming chu fakin awm rawh se. Ni 15-16 November, 2025 khán Hailakandi bial zaipáwl te Aizawl West II Area Masihi Sangati Meet Vawi 10-naah Luangmual Vengthlang kohhran te kal tlanga sàwm kan ni a. Luangmual Vengthlang Kohhran committee-in inhawng taka keini ve mai min hre reng hi kan lâwm tak zet a ni. Luangmual Vengthlang Kohhran hian kan kalna sènso leh ei leh in zawng zawng min tumsak a. Tin, Aizawl West II Area Masihi Sangati committee-in Meet-a tel vena hun min siamsak hi kan lâwm hle. Min bialtu Pastor, Rev. Vànlahchúnga leh Hailakandi Bial Standing Committee-in helai hmun kal min phalsak avàng pawhin làwm thu ka sawi a, missionary-te kan chhuah theih nána phalna min petu kan AS, Rev. Lalrinthara i/c Barak Area chungah pawh làwm thu ka sawi bawk a ni.

Hailakandi bial hi kum 2001-a din a ni a. Túnah hian Kohhran paruk, Preaching Station pali leh House Fellowship pathum a awm a. Bengali kohhran kan ni a, inkhâwmnaah Bengali (Bangla) òawng kan hmang thin a ni. Member kan tam lo va, bial inkhâwmpui nikhuaah pawh 100 kan tling ngai lo.

Ni 14 (Zirtawpni) zàn khán Gharmura Mission Compound-ah kan riak a, kan hla sak tùr kan en nawn a. Convener leh zaipáwl member 21 kan kal thei a. A tùk Inrinni zíng dár 5:30-ah Bus-in Gharmura Mission Compound aṅgingan kan chhuak a. Jamira Train station aṅgingan Sairang kan pan a, Sairang Train-a kan

chuan vawi khatna a ni hlawn a, nuam kan tiin kan hlim tláng hle. Luangmual Kohhran Ramthar Committee ten min lo hmuak a. Bus-in Aizawl kan pan leh a. Luangmual Vengthlang Kohhranah tûkthuan kan ei bâkah kan riahna tùr hmun nuam tak min lo buatsaihsak a ni.

Tûkthuan ei kham dár 11:30 vèlah bus-in ATC lam kan pan a. ATC hi dár 12:45-ah kan thleng a. Kan member-ten nuam an ti hle a. Tláng sáng tak ațanga thla han lâk te an phûr hle a. A huhova thla la tùr pawhin kan ko khâwm mai thei lo. Office chawlh ni mah se kan hmuh theih chin pawh kha hmuhnawm kan tiin kan lâwm tláng hle a ni.

Kan member-te kal châkna ber erawh tûnlaia lâk tak *Sky walk* a ni a, chawhnu dár 2:15-ah kan thleng a. An kal châk êm êmna hmun an kal thei chu an lâwm hle a ni. Thla te kan la a, hun tiam zawh tawhah pawh duh tâwk tùra inkoh chawp kan ngai

hial a ni. Kal tumna dang la nei mah ila zàn lam inkhâwm tùr kan la nih avàngin kan haw tlang a, tlai dár 5:00-ah zanriah eiin hla kan en nawn a. Inrinni zàn ațangin *Meet* kan țan a. Zai pàwl hrang hrang paruk lai kan zai a, Mizorama zai thiam tak takte kára keini, a *key* dik pawha sa hlei thei lo awm khâwm khân *part*-ah te inthenin hla kan han rem ve chu insit a na duh hle a ni. Pathianin min awmpui a, zai thiam ni lo mah ila zai nung tih tal kan la hlawn alâwm.

Pathianni chawhmaah chanvo kan nei lo va, dawh sàl lamah thuttír kan ni a. Kan member-ten min duhsakna hi an ngai hlu hle a, VIP an intih phah hial a ni. *Meet* hman laiin *Area* huam chhúngah Evangelist leh Evangelist kawppui boral an awm avàng erawh chuan rilru a khingbai viau nân, inkhâwm pawh nuam ti takin kan zo ve leh mai.

Inkhâwm bànah chawhnu lam hla sak tùr en nawn a

lo ngai a, chawchhùn ei leh kan nulate sari kaih chhúng nèn chuan dárkár khat vèl lek hun kan nei a, duh ai chuan hun a tâwi hret. Chawhnu inkhâwm chu kan han òan leh ta a, Pathian faka zai leh lam a nuam òin hle. A thlengtute bâkah *Area* huam chhúnga mipuite leh zaipáwlten inkhâwpui kan hlut tláng hle.

Keini hi Barak *Area* Bengali Project-a rawngbáwl kan ni a. Hindi hla lam kan thiam a tam lo hle mai a. Chuti chung chuan zai leh lámín, kan theih ang tâwkin Pathian kan fak a. Chawhnu lamah zaipáwl panga thiam tak tak kárah kan han zai ve leh a. Solfa hla lam sa lovin Bengali hla thlúk dik takin a fak hla kan han puang chhuak ve leh a. A thiam ber chu ni lo mah ila, a danglam ber chu kan ni ang. Aw òim leh zai mawi tum lam aiin Pathian fak nán kan aw neih ang ang kan au chhuahpui ve phawng phawng a ni.

Aizawl ațanga chhuak ka nih venaah òiante leh rawngbàwlpui te bâkah ka chhúng-

ten min lo òawiàwm thei a, ka vânei hle a ni. Chawhnu inkhâwm bàn lamah fellowship-ah chanvo min pèkte kan han tihlawhtling ve leh thei a. Bengali *culture*-a bet tlat *Kirton*-in kan zai a. *Kirton*-ah chuan hla hruaitu pakhat a zai hmasa a, a zai ang chiahin member-ten kan lo zàwm a, a muang, a pangngai leh a rang tein kan zai a. *Kirton* hi an tui cháng chuan an tlaivàrpui òhak òhak thei a ni. Tin, an rimawi *Ghonti*, *Kortal* leh *Dhol* hmangin rimawi kan rem baw k a. Tin, vai awm vete khân an hrethiama, an lo tui hmél hmuh kha a nuam a, mi dangte erawh chuan hmuhnaawm thlirin min thlir thung. Chu bâkah kan bial ațangin Rupali Das-in *testimony* a sawi bâkah a *solo* baw k.

Zàn lamah kan âwl ve tawh tura kan ngaih laiin *programme*-a awm sâ ni lo, min ngenna avàngin zai leh tura tih kan ni a. Zanriah hi a thlengtu Luangmual Vengthlang Kohranin mipui zawng zawng tán chawhlui an buatsaih a, kan puarin kan tlai tláng hle a ni.

Pathianni zàn inkhâwm-ah hian a tîr phat aţangin zai ho a nuam leh nghâl a. Inkhâwpui tàwp zàn hi zai leh làm a nawm ber zàn a nih thîn angin hemi zàn pawh hi a nuam hle a ni. Zaipáwl paruk kárah keini baw kha kan lo tel leh thei a. Mizorama awm vai mistiri te leh hnathawka lo awm, a tam zâwk hi Bengali ţawng hmang an ni a. Chuvàng chuan keini pawh Hindi hla inbuatsaih lovin, keimahni awmna ţawng (Bengali) hla ngei kan sa leh a. Kan chanvo ang angte Pathian puihna azárah kan zo thei a, kan lâwm hle a ni.

He *Meet-a Speaker* chu Aizawl West Bial Masihi Sangati bialtu Pastor Rev. Lalhunthara niin, thupuih ‘Thu hretu atána koh kan ni,’ (Tirh 1:8) tih hman a ni. Speaker hian Hindi a thiam êm êm a. Mizo ţawng leh Hindi-in nâl takin thu a sawi a. A thu sawi a ngaihnawm a, thu sawi tha leh nung tak tak kan ngaithla a. Keimahni tán bik liau liau emaw tih mai tûrin, kan tána ţangkai tak tak

thu kan ngai thla a.

Pathian thu hretu kan nihna te, a thu hretu awm dân tûr te, member-te hmangaihna avàng chuan vuak hreh loh tûr tih aţanga kan ngaihsak dân tûr te, Chanchin Tha puang darhtu tûr kan nih dân te thu ropui tak tak, kan hman theih nghâl tûr min fah mawlh mawlh a. Masihi chu ‘*sáng tûr, langsàr tûr kan ni lo, hmun kilkhâwr leh mi in kàwmkára lût mai mai kan ni,*’ a tih te chuan ngaihtuahna a tithui hle. Kan member-te hi Bengali ni mah se Hindi an hriatthiam vek avàngin kan speaker thu sawi ropui tak an dawngsawng tha a, kan lâwm tláng hle a ni.

Thawhţanni zing dár 5:30-ah Luangmual Vengthlang Kohhran Biak In hnuaiyah Luangmual Ramthar Committee Chairman, Upa Thangmawian ţawngţaiin min thlah a. Taxi paruk laiin min thlah leh baw k a. Dár 7:15-ah Sairang aţanga chhuakin, keimahni awmna hmun theuhvah ‘a thu hretu atána

koh' ni chhonzawm tûrin kan lêt leh a ni.

Luangmual Vengthlang Kohhranin Hailakandi bial zaipawl te *Meet* hmang tûra min sáwm hi kan lâwm tak zet a. Barak Area huam chhúngah hetiang *programme* chhim tûra Mizoram lam aţanga sàwmna hi a la awm ngai lo va, a wawi khatna kan ni hi kan vânni tak zet. Chìn chhonzawm atán pawh thil tha tak a ni. Tin, ei leh in tûr tui tha tha min lo hlui a, eng mah ni lote min lo ngaihlu a, min lo chawi mawi thiam a, tu mai pawh khân min lo dawng-sawng tha êm êm mai si a. Mahse, vai ram aţanga kal kan nih vâng maia keini mawng leh chàwn inhnaih tê tê pawh hnam dang emaw min lo ti tlat te kha a hlu dangdai hle bawk.

Kan dam chhúngin kan member-te bâkah, keini pawh-in khatiang taka ngaih hlutna

hmun leh dah pawimawhna hmunah khán kan kal leh tawh kher ang em? Kan hun tawn tawhah chuan a ropui berte zinga mi a ni ngei ang.

Vai ramah Kristian kan tlém a, khatianga kristian pun khâwm tamna, Biak In lian leh ropuia kan member-te an inkhâwm thei te kha aw! Ngaihtuah zâwng ringawt pawhin làwm avàngin mittui a tla thei.

Luangmual Vengthlang Kohhranin sum leh pai an sèn zawng zawng te a thlawn lo vang. Phú loh malsàwmna leh chawi mawina kan chan leh kan dawn te, kan member ten nuam an ti lutuk te - hêng zawng zawng hi an thilung-ah chî angin a nung ang a, kohhran ban nghet an nihna tûrah puitu a ni ngei ang. Hailakandi bial tán leh Barak *Area* tán sùlhnu ropui tak a ni.

Egypt rama mi thiam pakhat, Muslim ruh tak ni thìn hian Missionary hnênah, "Kan inhnial chángte hian ka la dang ngai lo va, i thu te hian ka thilung a hmin ngai lo. Mahse, i nun hian min hneh êm avàngin tûnah chuan Krista neitu ka ni ve ta," tiin zuk hrilh a!

RAMTHAR FEH

1 .

1. **Field Hming** : Tripura mission Field
2. **Tlawhna hmun** : Noangang, Ambassa leh Agartala bial
3. **Tlawh hun** : Ni 22-27.10.2025
4. **Kal zât** : 15
5. **Tlawhtu** : Melthum Kohhran
6. **Tlawh chhan** : Kan Ramthar rawngbàwlna hmunhma leh thawktute zuk hmuh leh Kohhranhote tûn aia nasaa Ramthar rawngbàwlna kan lo vei leh zual theih nân

Melthum Ramthar Committee chuan kum 2025 kum tîr khân kum 2025 chhúngin Ramthar field tlawh ni se tiin project-ah a nei a. Sanghate zuarin leh thawmhnaw hluite la khâwmin, bungbel hman duh tawh lohte khawn khâwmin sum kan tuak a. Ramthar zin tùra inpe thei chu mi 15 kan ni a.

7. Kalkawng leh hun hman dân: Ni 22.10.2025 zingah Pu Peter Vânlalvenpuian thingpui leh a hmeh tùr chhang min lo chhawp chu kan in zawhin Bus-ah ÷awngtâiin min thlah liam a. Kawng a thuiin *mobile* en chawpin kan kal a, “Vawi sarìh vèl chu kawng kan bo,” Driver-in a ti. Chuti chung chuan Noangang chu tlai dâr 5:00 vèlah kan thleng a. Kan missionary-ten theih tâwpin min lo dawngsawng a. Ni Lalengzami Chhakchhuak, Bethlehem English Higher Secondary School, Noangang Principal làwm thu sawia a ÷awngtâi hnuin kan thlen in min lo siamsakah chuan naupanghovin min hruai ta hlawm a. Thlen inah kan inbualin chaw kan ei sawk sawk a, Kan puala programme an lo siamna, Noangang Kohhranah chuan kan zuk inkhâwm a. A tûkah Bandh an huaihawt avàngin Noangang-ah chuan kan chám a. Kan Principal hovin Missionary-te nèn kan inkàwm khâwm a. An rawngbàwlna chanchin te kan ngaithla a, chawhnu lamah Noangang bul vèla kohhrante a theih theih kan tlawh kual leh a.

Ni 24 zingah Ambassa-ah kan chhuk a. Rev. Lianzangthang Ranglong, Bialtu Pastor leh thawktute leh kohhran hruaitu ten min lo dawngsawng a. Group li-ah inthenin kohhran hrang

hrang - Ambassa, Gontachhora, Nalichhora leh Aichukpohar te chu zànah kan va inkhâwpui a.

A tûkah Agartala khawpui panin zingah chhuk lehin, dár 10:00 vèlah kan thleng a. Pu Bishnu Molsom chuan min lo hmuakin, kan thlenna hmun tùr Tripura Synod House-ah chuan min hruai a. Rev. Kalu Kalai, Executive Secretary chuan ÷awngtáinate neiin kan riahna tùr lamah chuan kan kal ta a. Zàn lamah chuan bialtu Pastor H.D. Ramngaihawma leh Pro Pastor Lalremruata Darlong te nèn Debramthakur Kohhran, Nl Lalchhandami, Missionary, Mamit enkawlah chuan kan va inkhâwm a. Min lo dawngsawng ÷ha hle.

A tûk ni 26 (Pathianni) chuan Bialtu Pastor lo ruahman angin hmun thumah inthenin - Satukura Branch Church, Gabordi Branch Church leh Shymagar Kohhranah te kan va inkhâwm leh a. Shymagar Kohhranah hian Bialtu Pastor-in mi pathum baptisma chantírin Lalpa Zanriah Sakramen a ÷heh bawk a. Kan va inkhâwmna hmuna kohhranhote hian ÷ha takin min dawngsawng vek a, chawhlu min lo kílpu ÷heuh bawk. Zàn lamah chuan Mizo inkhâwmah kan va inkhâwm leh a. Kan Leader, Rev. B. Lalnghaklian Pathian thuchah min hrilh leh a.

A tûk zing taka kan chhuah dáwn avàngin Rev Kalu Kalai, Tripura Synod hotu chuan zàn lamah ÷awngtáin min thlah a. Zingah Bus-ah Pi Zaihmingthangin ÷awngtáin min thlah leh a, kan haw kawng chu a lo chhe viau mai a. Vawi hnih vèl kan tàn hnuin Melthum chu zàn dár 10:30 vèlah kan thleng thei ta hrâm a ni.

Tripura Mission Field hi Nl. Maengin min hrilh dânin kum 1986-ah hawn niin, Noagang hmuna Headquarters awm ÷hìn kha kum 2008-ah Agartala hmuna sawn a ni. March 24, 2019-ah Synod puitlingah hlân kai a ni. Presbytery hi 5 niin, Pastor bial hi 22 a awm a. Kohhran hi 351 niin Upa 247, dân zawhkim 17,692 awmin member zawng zawng hi 25,266 an ni. Tripura Field-ah hian thawktu 434 an bung mék a, Synod Mission Board Evangelist 50, ET 69, Medical worker 9, Craft Teacher 6, Office staff 6, thawktu (sponsor) 149, Mizo 79 leh Field Worker 78, Kraws sipai 67 an awm bawk. Kumin 2025-ah ringthar 1,000 neih an tumah October

2025 khán ringthar 1,014 lai an tling ta. Kan zuk tlawh kohhran te, missionary te, bialtu Pastor te, Field Secretary Rev. H. Lalrinsanga leh Tripura Executive Secretary, Rev. Kalu Kalai te chungah kan lâwm tak meuh meuh a ni.

R. Lalbiakdika, Ramthar Ziaktu (Asst)

2.

1. **Field Hming** : Nepal Mission Field
2. **Khua** : Pokhara, Dhading, Khading, Lapchet leh Kathmandu
3. **Tlawh hun** : Ni 27.10.2025-16.11.2025
4. **Kal zât** : Mipa - 10; Hmeichhia - 6
5. **Tlawh chhan** : Kohhran tlawh leh kan unaute hnêna Chanchin Thā hrih
6. **Sênso zât** : ₹ 2,98,000 vêl
7. **Tlawhtu** : Khristiya Yuwa Sangathan (KYS), Tlangnuam Kohhran Masihi Sangati

8. Kalkawng leh hun hman dân: Ni 27.10.2025 (Thawhtanni) zing dár 7:15-ah Sairang ațangin NJP thleng rélin kan kal a. Siliguri ațangin Kakarvita kan lût a. Zàn riak lovin tlaiah Pokhara kan pan leh a. Hetah hian Inrinni inkhâwm (1.11.25)-a tel ve ngei kan duh avângin ni li lai kan chám a. Inkhâwmah hian mal zai, zai páwl, *worship dance* leh thu sawina hun min pe a, kan lâwm hle. Pokhara ațangin ni 2.11.2025 (Pathianni) zingah Dhading kan pan a, Dhading-ah hian zànah kohhranhoten inkhâwmna hun min buatsaihsak a (Nepal-ah chuan Inrinni chhùnah chauh an inkhâwm). Zai páwl leh thu sawina hun min pe a, kan lâwm hle, hemi zànah hian hotel-ah kan riak a.

Dhading ațangin ni 3 zingah Khading lam panin Borang thleng Motor-in kan kal a. Heta țang hian dárkár li vêl kein Khading Khua kan thleng. Khading Khuaah hian kár khat kan chám a. Kohhran in tlawh leh ringlote ina kalin zai hona te, thu sawina hun te leh țawngțaina hun te kan hmang. Koh-hran inkhâwmah mal zai, zai páwl, *worship dance* leh thu sawina te changin hun kan hmang leh a. Ringlo eng emaw zâtin kan inkhâwm hi min telpui avângin kan lâwm hle.

Khading aṭang hian ni 9 (Pathianni)-ah Lapchet khua panin ke-in dárkár li vèl kan kal leh a. Kan thlen zànah in-khâwmna hun min buatsaihsak a, *worship dance* leh thu sawina hun kan hmang. Ringlo eng emaw zâtin kan inkhâwm an rawn chhim avàngin kan lâwm hle. A tûkah Lapchet aṭangin dárkár hnih vèl ke-a kalin Borang kan thleng leh a. Borang aṭangin Dhading kan kal a, hetah hian hotel-ah kan riak.

A tûk, ni 11 zingah Kathmandu (Field Office) kan pan a. Nepal Field Secretary leh Pastor te nèn kan inbiak pawh that theih loh avàngin hotel-ah kan riak a. A tûkah Nepal chhúnga Mizoten ‘Mizo Kut’ an hmang a, hetah hian mi eng emaw zâtin kan telpui ve nghe nghe a. Field Office-te tlawhin tlaiah Kût Chaw kan ei a. A tûk ni 13 (Ningani)-ah Kathmandu aṭangin Mizoram lam panin kan haw a. Ni 16.11.2025 zànah tuang takin Tlangnuam, Aizawl kan thleng.

9. Làwmawm lam: Khading khua hi kan pi leh pu/Nu leh Pa/ú leh naute awmna khua a nih avàngin heta kal tùr hian kum hnih lai *project*-ah neihin, member-hoten ṭhahnemngai takin pawisa, thla tin ip hmangin kan thawh khâwm a. Sangati leh Kohhran Hmeichhia ten ₹ 10,000 ve vein min pui bawk a. Pathian khawngaihna zarah kan *project*-te kan han tipuitling ve thei hi keini Tlangnuam Khristiya Yuwa Sangathan te chuan làwmawm kan tiin, ṭhahnemngai taka pawisa thawhtu kan member-puite chhúngah pawh làwm thu kan sawi tak meuh meuh a ni.

Tin, kohhran kan tlawhten inkhâwmna hun te min siamsak a, ei leh in bâkah riahna nuam tak min ngaihtuhsak ṭhin a. Theih tâwp chhuaha min lo dawnsawn ṭhin avàngin an chungah kan lâwm tak zet a ni.

10. Report ṭûl dang: Kohhran kan tlawhte hnênah làwm thu sawina/ṭanpuina hetiang hian kan pe (NC = Nepal pawisa):

- | | | |
|-------------------------|-------------------|---------|
| 1) Pokhara Kohhran | : ₹ 10,000 (NC) = | ₹ 6,250 |
| 2) Khading Kohhran | : ₹ 10,000 (NC) = | ₹ 6,250 |
| 3) Khading K. Hmeichhia | : ₹ 5,000 (NC) = | ₹ 3,125 |

- 4) Khading Khawtlang Hruaitute: ₹ 5,000 (NC) = ₹ 3,125
 5) Pu Gore Gurung te chhúngkua: ₹ 5,000 (NC) = ₹ 3,125
 6) Evan Umesh Gurung : ₹ 1,000 (NC) = ₹ 625

Hêng kan zin chhúng zawnga eng mah harsatna tâwk lova Pathian min hruaina kan chan zawng zawngah làwm thu kan sawi a ni.

3.

1. **Field Hming** : Siliguri Mission Field
2. **Khua** : West Bengal
3. **Tlawh hun** : Ni 30.10.2025 – 5.11.2025
4. **Tlawhtu** : Bawngkawn Kohhran
5. **Kal zât** : 18
6. **Tlawh chhan** : Field tlawh
7. **Hna thawh** : Pastor bial tlawh leh tanpuina pêk
8. **Sum hman zât** : ₹ 3,45,000

9. Kal kawng : Field tlawh tùr hian October ni 30, zing dár 5:30-ah Bawngkawn Synod Book Room kawt ațangin bus-in kan chhuak a, Sairang ațangin relin zing dár 7:15-ah chhuak lehin New Jalpaiguri Train Station chu October ni 31, zing dár 5:15-ah kan thleng. Heta țang hian Siliguri Misson Field Office, Pradhan Nagar kan pan nghâl a, zing dár 6:40-ah Siliguri Misson Field Office chu kan thleng a ni. Field Secretary, Rev. Lalrinfela Pachuauvin țawngțainain min lo dawngsawng a ni.

10. Thu làwmawm lam : Siliguri Field chhúnga pastor bial hrang hrang tlawh kual nan hian *sumo* pahnih kan hmang thìn a. October ni 31, zing dár 11-ah Mirik Pastor Bial panin kan chhuak a, chhùn dár 1:30-ah kan thleng. Mirik pastor, Pu Andy Vánlaluata leh a thawhpuite nèn pastor quarters-ah inkawm khâwmna hun tha tak kan hmang a, Ramthar Chairman, Upa H Lalthlamuanan thu sawiin report a pe nghâl a ni. Mirik Pastor Bial chhúnga rawng bàwlina chanchin kan ngaihthla a, hun hlimawm tak kan hmang zui

nghål a ni. November ni 1, zing dár 8:00-ah chhuakin Jaigaon Biak In leh Khokla Biak In kan tlawh a, bialtu Pastor, Rev Deepak Gautam leh a rawng bàwlpuiten min lo hmuak a, Jaigaon pastor quarters-ah hian inkawm khâwmna hun ða tak kan hmang a ni.

November ni 2 (Pathianni) chawhma inkhâwmah chuan Biak In pathumah inkhâwmna hun kan hmang a; hmun thumah mi paruk zêlin kan inþen darh a ni. Kan Biak In tlawhte chu – 1) Simulbari Biak In 2) Mantadari Biak In leh 3) Khawlachanfabri Biak In te an ni. Chawhma inkhâwmah hian thawktute nèn ða takin kan inkhâwm ho va, tlai dár 5:00-ah Topline Biak In hi kan thleng leh a ni. Hetah pawh hian a thawktuten ða takin min lo dawngsawng a ni. He kohhranah hian Biak Ina inkhâwm tùra kan luh dáwnin kan ke min silsak vek a, inkhâwmna hun ða tak kan nei zui a, Topline Kohhran leh Bawngkawn Kohhran chanchin kan ngaithla a ni.

November ni 3, zàn dár 8:00-ah Field Secretary, Rev. Lalrinfela Pachuau quarters-ah thawktu remcháng ang angtè nèn *devotion* hman pahin inkawm khâwmna kan nei a ni. November ni 4, zing dár 8-ah Pradhan Nagar Biak In kan tlawh a. Pastor Dr. PS Daniel-te nèn inkawmna hun ða tak kan nei zui a. Zàn dár 9:50-ah New Jalpaiguri Train Station aþanga rawn chhuakin November ni 5, zàn dár 8:00-ah Sairang kan rawn thleng chho va, zàn dár 9:30-ah Pathian kaihhruainain Bawngkawn Synod Book Room kan rawn thleng thei ta a ni.

11. Report ðul dang: Siliguri Mission Field hi Bawngkawn Kohhran aþanga kum 2006-a missionary-a chhuak, Pu Johny Chawngthanrila, Office Assistant-a a thawh mékna a ni a. Kum 2009 khán Pastor H. Lalntlanthanga Field Secretary a nih laiin Siliguri Mission Field Area-a Khokla Biak In tukverh leh *lectern* siam hna kan lo thawk tawh bawk. Tin, Bawngkawn Kohhran hian Siliguri Mission Field chhúnga Biak In sak ðanpui nán ₹ 2,00,000 a pe bawk a ni.

K. Vánlalremruata, Ramthar Ziaktu



PUNNA 2025

Sl. No.	FIELD	HAWN KUM	JAN-DEC
I. HOME MISSION			
1	Home Mission North	1949	43
2	Home Mission South	1987	50
3	Masihi Sangati	1979	3,318
II. NORTH EAST REGION			
1	Arunachal & Assam Mission Field 'E'	1991	69
2	Arunachal & Assam Mission Field 'N'	2016	44
3	Arunachal & Assam Mission Field 'W'	2001	80
4	Assam Mission Field	2008	80
5	Barak Area	1975	66
6	Karbi Anglong Mission Field	1989	180
7	Tripura Mission Field	1986	1239
8	Upper Assam Mission Field	2025	51
9	Cachar Tlangram	2023	55
III. CENTRAL REGION			
1	Calcutta Mission Field	1988	828
2	Delhi Mission Field	1988	139
3	Jharkhand Mission Field	2008	376
4	Lucknow Mission Field	1999	19
5	Odisha Mission Field	2016	115
6	Patna Mission Field	1999	220
7	Siliguri Mission Field	1988	92
IV. RAM PAWN			
1	Cambodia	2010	23
2	Nepal Mission Field	2000	153
BELH KHAWM			7,240

RAMTHAR MAN PÈK DÁN



Bank Transfer hmanga pe duh tán a hnuai Account Number tár lanah hian a pêk theih bawk e.

Account Holder : SYNOD RAMTHAR
Account No : 10665621086
IFSC : SBIN0007058
Bank : State Bank of India
Branch : Mission Veng

Ramthar man pete chuan an pêk veleh
WhatsApp No. **8974694225**-ah inhratfír ní se.

Postal Regn. No. MZR/46/2024-2026

RNI Regn. No. 40889/88



Ni 1.2.2026 (Pathianni) chawhnu dár 12:30 khán CHAKMA CHRISTIAN FELLOWSHIP, AIZAWL chu Khatla North Kohhran Hall-ah Upa Vanram-mawian hawngin, Pathian hnênah a hlán.

Chakma Christian Fellowship enkawl tùr hian Pi Saithangpuii Sailo leh Tv. C.Lalthlamuana te ruat an ni.

**Khristiya Yuwa Sangathan
(KYS),
Tlangnuam Kohhran Masihi
Sangati te Nepal Field
tlawhin
(phêk 29-31)**



Galaxy S24 Ultra

If not delivered please return to:
The Manager
Ramthar Chanchinbu
Synod Office, Aizawl, Mizoram
India. Pin-796001

To,

*Published by Rev. R. Lallhingsanga and Printed at the Synod Press, Aizawl
on behalf of Ramthar Association, Aizawl, Mizoram. Copies - 39,000*